

Dobrodošli u školu!





**Na goteborg.se/
grundskola naći ćete
više informacija**

Dobrodošli u školu! U ovoj brošuri sakupili smo ono što može biti dobro znati prije nego što vaše dijete na jesen krene u školu. Brošuru na različitim jezicima i druge informacije možete naći na www.goteborg.se/borjaskolan

Vrijeme je da vaše dijete krene u školu. Na jesen oko 6 000 djece kreće u predškolski razred i sada se spremaju za taj novi i tako uzbudljivi period!

Ali nemaju samo djeca pitanja i nedoumica pred polazak u školu. Osjećati se sigurno pred promjenom je važno i za vas i za vaše dijete. Ovim informacijama želimo vam reći više o tome šta mi u osnovnim školama grada Geteborga nudimo vama i vašem djetetu.

Uprava osnovnih škola se nada da ćete se vi i vaše dijete osjećati srdačno dočekani i pripremljeni za polazak u školu.

Dobrodošli u školu!





Šta podrazumijeva predškolski razred?

Jednostavno rečeno, predškolski razred se može opisati kao kombinacija pedagogije i načina rada vrtića i škole. Nastava u predškolskom razredu nadograđuje ono što je dijete naučilo u vrtiću. Međutim, pred vaše dijete se takođe postavlja izazov da otkriva i uči nova znanja, čime se priprema za nastavak svog školovanja.

Nastava treba razviti maštu vašeg djeteta, empatiju i sposobnost učenja zajedno s drugima. To radimo kroz igru, kretanje, istraživanje i praktične načine rada. Djelatnost traje najviše šest sati dnevno.

Ako vaše dijete ima intelektualne teškoće i predškolski razred nije najbolja opcija, možete podnijeti zahtjev za odgodu školske obaveze ili raniji polazak u školu.

Pohađanje predškolskog razreda, osnovne škole i prilagođene osnovne škole je besplatno.

Treba li vašem djetetu mjesto u produženom boravku?

Ako radite ili studirate, vaše dijete može boraviti u produženom boravku prije i nakon školskog dana. Učenici takođe mogu imati pravo na mjesto i u drugim situacijama zbog porodične situacije ili zbog potreba učenika. Na primjer, ako je djetetu potrebna podrška u učenju švedskog jezika ili ako porodica živi u vrlo skućenom prostoru.

Nastava u produženom boravku i u predškolskom razredu je u velikoj mjeri slična, ali nastava u produženom boravku može takođe biti i dopuna nastavi u predškolskom razredu.

Prijavite se za produženi boravak prije 31. maja, pročitajte više na goteborg.se/fritidshem



Prije nego što vaše dijete krene u školu

Mnogo je novih stvari kada dođe vrijeme da se krene u školu, kako za vaše dijete, tako i za vas kao staratelja.

Informativni sastanak za staratelje

Škola vašeg djeteta će vas pozvati na informativni sastanak prije početka školske godine. Tokom sastanka dobit ćete informacije o predškolskom razredu i produženom boravku u školi vašeg djeteta. Informativni sastanak se održava krajem proljeća.

Vaše dijete može posjetiti svoju novu školu

Prije početka školske godine vaše dijete može barem jednom posjetiti svoju novu školu. To se radi krajem proljeća. Ako je moguće, vaspitač iz vrtića vašeg djeteta će pratiti dijete tokom posjete ili posjeta. Ali ako to nije moguće, možete vi pratiti dijete. Posjeta predškolskom razredu i produženom boravku bi trebalo da pojednostavi prelazak u školu i učini ga sigurnijim za vaše dijete.



Razgovor za dobrodošlicu za vas kao staratelja

Dobit ćete poziv na razgovor za dobrodošlicu s novim učiteljem vašeg djeteta. Razgovor za dobrodošlicu se održava prije početka školske godine ili kada vaše dijete tek krene u školu, dakle negdje između juna i septembra.

Tokom razgovora ćete imati priliku da pričate o svom djetetu i postavite pitanja koja se tiču školovanja vašeg djeteta. Svako dijete je jedinstveno i ovaj sastanak je tu da se upoznate i razgovarate šta je vašem djetetu potrebno kako bi se osjećalo sigurno pred početak škole.

Ponekad škola može trebati napraviti prilagođavanja prema potrebama vašeg djeteta. Ako su vašem djetetu potrebne posebne adaptacije, važno je da škola to sazna na vrijeme. U tom slučaju, zamolite vrtić vašeg djeteta da obavijesti školu ili sami kontaktirajte školu što je prije moguće.

Tokom razgovora za dobrodošlicu dobit ćete informacije o tome kako će izgledati prvi dani u školi.



Kako funkcionira predškolski razred i produžena nastava?

Dovođenje i odvođenje

Vaše dijete mora biti u predškolskom razredu u određeno vrijeme. Ako vaše dijete treba brigu prije ili poslije tog vremena, zbog vašeg posla ili studija, vi dovodite i odvodite vaše dijete u produženi boravak. Vaše dijete treba da se osjeća sigurno tokom cijelog dana, stoga su učitelji prisutni tokom prelaska iz predškolskog razreda u produženi boravak.

Obroci u školi

Svi učenici dobijaju besplatan ručak u školi. Ako vaše dijete ide u produženi boravak prije ili poslije škole, dobijaće i doručak i užinu. Ako vaše dijete treba prilagođeni obrok ili specijalnu ishranu zbog alergija ili intolerancija, razgovarajte sa školskim osobljem kako biste podnijeli zahtjev. Često je potrebno da zdravstvene službe prvo procijene potrebe vašeg djeteta. Ne trebate podnositi zahtjev za specijalnu ishranu ako dijete želi vegetarijansku hranu ili hranu bez svinjetine u školi.

Zabranjeno je unositi orahe, bademe, kikiriki i sjemenke susama u škole u Geteborgu.

Odjeća prema vremenskim prilikama i aktivnostima

Dio nastave u predškolskom razredu i produženom boravku podrazumijeva da učenici imaju priliku razvijati radost kretanja i dobiti inspiraciju za nova otkrića.

Stoga je važno da vaše dijete ima odjeću prilagođenu različitim aktivnostima, kako u zatvorenom tako i na otvorenom prostoru, bez obzira na godišnje doba i vremenske prilike.

Takođe, imajte na umu da vaše dijete treba imati rezervnu odjeću u školi, u slučaju da se treba presvući u suhe i čiste stvari tokom dana.



Podrška i nastava maternjeg jezika

Ako vaše dijete ima drugi jezik osim švedskog kao maternji jezik, predškolski razred i produženi boravak trebaju omogućiti vašem djetetu da razvija i švedski jezik i svoj maternji jezik. To se postiže kroz različite aktivnosti gdje učitelji posvećuju pažnju i potiču korištenje maternjeg jezika djeteta u svakodnevnim aktivnostima.

Nastava maternjeg jezika nudi se od prvog razreda osnovne škole. To se odnosi na sve jezike osim nacionalnih manjinskih jezika, gdje grad Geteborg nudi nastavu maternjeg jezika već od predškolskog razreda.

Osiguranje

Svi učenici koji su registrirani u Geteborgu osigurani su od nesreća, 24 sata dnevno do punoljetstva. Osiguranje pokriva samo nesretne slučajeve.

Vklass

U Vklass-u učenici i staratelji mogu dobiti uvid u sve što se tiče škole. U Vklass-u možete, između ostalog, pratiti razvoj znanja, prijaviti izostanke i dobiti informacije od škole.

Školski prevoz i školske kartice

Svi učenici u predškolskom razredu, osnovnoj školi i prilagođenoj osnovnoj školi koji su registrirani u Geteborgu dobijaju besplatne školske kartice unutar Geteborga, bez obzira na udaljenost između kuće i škole. Školski prevoz, kao što je taksi, može biti obezbijeđen za učenike s posebnim potrebama.



Polugodišta i raspusti u predškolskom razredu

Školska godina je podijeljena na dva polugodišta: jesenje polugodište i proljetno polugodište. Sve općinske škole u Geteborgu imaju istu školsku godinu. To znači da svi počinju i završavaju školu istog dana i da svi imaju raspust u isto vrijeme. Produženi boravak je otvoren i tokom raspusta za učenike koji imaju potrebu za brigom.

Znate li da...

Sva djeca su obavezna pohađati školu od jesenjeg polugodišta one godine kada pune šest godina. To znači da je pohađanje predškolskog razreda obavezno.




U slučaju bolesti, vaše dijete mora ostati kod kuće

Ako je vaše dijete bolesno, morate ga prijaviti kao odsutno zbog bolesti. Informacije o tome kako prijaviti odsutnost dobit ćete od učitelja vašeg djeteta.

Zahtjev za kraće odsustvo

U predškolskom razredu prisustvo je obavezno. To znači da vaše dijete mora prisustvovati svim nastavnim aktivnostima. Međutim, vaše dijete može dobiti slobodne dane ako postoji valjan razlog, na primjer, porodična svečanost ili vjerski praznici.

Direktor škole procjenjuje može li vaše dijete dobiti odsustvo iz predškolskog razreda. Ako želite podnijeti zahtjev za odsustvo, morate popuniti obrazac.



Šta je Uprava osnovnih škola?

Uprava osnovnih škola je odgovorna za djelatnost općinskih škola u gradu od predškolskog razreda do kraja devetog razreda, prilagođenih osnovnih škola i produženog boravka. Radimo zajedno kako bismo stvorili najbolje moguće uslove da svi učenici, u svim školama u Geteborgu, dobiju priliku oblikovati dobar život.

Stvaramo put ka školi budućnosti.

Imate li nekih pitanja?

Možete nas kontaktirati na:

Telefon

031-365 09 60 (kontaktni centar)

Mejl

grundskola@grundskola.goteborg.se

Informacije možete naći i na:

goteborg.se/grundskola

